



**JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL**

Komunikadu Imprensa

Periodu : Jullu 2011
Edisaun : 06 Jullu 2011

**JSMP Marka Audiénsia ho Prezidenti Komunitade Islamica Iha
Timór Léste**

Iha loron 04 fulan Jullu 2011, Programa de Monitorizasaun do Sistema Judisiál ka JSMP hetan oportunidade hodi halo audiénsia ho Prezidenti Komunitade Islamica Iha Timór Léste iha Centru Komunitade Islamica Timór Léste, iha sira nian servisu fatin, rua Mesjid An'ur Kampo Alor Dili Timór Lesté. Audiénsia ne'e hahu iha oras tk 10.00 to 11.00 OTL. Iha audiénsia ne'e JSMP ho ninia equipa hamutuk ema nain lima (5), no husi Komunitade Musllumanu nian Prezidnete Komunitade Islamica Sr. Ipólito Soares ho ninia equipa hamutuk ema nain haat (4).

Diretór Ezekutivu JSMP, Luis de Oliveira Sampaio haktuir katak, audiénsia ne'e hanesan kontinuasaun planu JSMP nian *atu mobiliza apoiu husi entidades hotu hanesan Igreja katolika, Protestante inklui Komunitade Islamica iha Timór, hodi bele kontribui hametin desenvolvimentu iha setór justisa iha nasaun ida ne'e.*

JSMP konvensidu katak hanesan ema Timór oan iha responsabilidade atu hametin setór justisa iha nasaun ida ne'e. Tanbá tuir JSMP nia hanoin katak setór justisa sai hanesan instrumentu save no fundamental tebes iha prosesu dezenvolvimentu nasaun no setór ida ne'e la'ós partensia ba JSMP nian deit maibe partensia ba ema hotu nian inklui Komunitade Islamica iha Timór Léste.

JSMP hare katak durante ne'e organizasaun relioza sira tau hela matan ba setór justisa, oinsa mak setór justisa ne'e bele dezenvolve-an no setór ne'e sai hanesan fatin ba ema hotu atu reklama sira nia direitu wainhira sira nia direitu ne'e hetan violasaun ka proteze sira nia direitu husi aktu iregularidade sira.

Audiénsia ne'e hahu hodi intrudus konabá istória no papel JSMP nian iha área justisa, progresu no dezafiu sira iha setór justisa nian, razaun tanbá sa JSMP hari no nia prezensa iha setór justisa durante ne'e, no komitmentu JSMP nian ba futuru.

Iha parte seluk Prezidente Komunitade ne'e hato'ó nia laran haksolok ba vizita ne'e no louva ba iniativa husi JSMP hodi halo enkontru ho instituisaun sira inklui Komunitade Islamica Timór Leste. Maske durante ne'e Komunitade Islamica Timór Léste ladun

hatene didiak knaar prinsipal husi JSMP maibe liu husi enkontru ida ne'e bele loke dalan ba Komunitade Islamica Timór Léste hodi bele hametin relasaun ne'ebé diak liu tan atu nune'é ita bele kontribui desenvolve sistema justisa ida ne'ebé forte no kredível iha nasaun ida ne'e.

Liu tan nia hatutan hodi rekoñese katak durante ne'e sira ladun asesu ba Tribunál, maibé sira sempre akompaña lalaok husi governu nian. Tuir nia katak desenvolvimentu setór hotu-hotu inklui setór justisa sei nafatin iha intervensaun no iha diskriminasaun. Tanbá ne'e importante tebes atu ita hotu hamutuk hodi tau matan ba desenvolvimentu nasaun ida ne'e.

Antes atu konklui ninia intervensaun nia mós dala ida tan lori Komunitade Islamica Timór Léste hato'ó agredesementu ba equipa JSMP ne'ebé loke ona espasu ida ne'e hodi kria no hametin relasaun diak ho instituisaun save importante sira hotu inklui Komunitade Islamica Timór Léste hodi bele kontribui ba desenvolvimentu iha setór justisa nian, atu nune'é justisa ne'e bele aplika be sidadaun hotu-hotu no labele hare ba ras, kor, no relijiaun.

Atu hetan informasaun kle'an, favor kontaktu;

Luis de Oliveira Sampaio

Diretór Ezekutivu JSMP

Telefone: 3323883/7295795

Email; luis@jsmp.minihub.org